

SCRIPT OF MORNING GOJRI NEWS BULLETIN 16JULY 2026 1015HRS

مارننگ گوجری نیوز بولیٹن 16 جولائی 2026

یوہ آکاشوانی جموں ہے باغ علی طاہرتیں خبر سُنو۔

LG AI

لیفٹیننٹ گورنر منوج سنہا غو کہنو ہے جے مصنوعی ذہانت تعلیم روزگار تے معشیت مانہ بدلائو پیدہ کررئی ہے تے اس راہ انسانی تہزیب غو اک نوو دور شروع ہو رہیو ہے ایل جی موصوف نے اس گل غو اظہار مصنوعی ذہانت بارے اپنا اک اہم خطاب غے دوران کیو۔ ڈاکٹر سریش اوستھی لیکچر سیریز ور اپنا خطاب غے دوران لیفٹیننٹ گورنر نے مصنوعی ذہانت غا اثرات تے اس غا ضمنی اثرات ور اپنا خیالات غو اظہار کیو ، اُن غو کہنو تھو جے مصنوعی ذہانت ہُن روز مرہ زندگی غو اک اہم حصو بن چُکو ہے تے اس راہ کہراں سکولاں اسپتالاں کھیتاں تے سرکاری نظام مانہ داخل ہو غے یاہ ہُن صحت ذراعت تے تعلیم غا شعباں مانہ دور دراز گرایاں توڑی وی بہتری لیا رئی ہے۔ لیفٹیننٹ گورنر نے اے آئی یعنی مصنوعی ذہانت نانہ سنجیدگی سنگ تے دور اندیش نظریہ سنگ اپناں غی ضرورت ظاہر کی۔ اُنہاں نے کہیو جے بھارت غو امیر ورثو ہم نانہ مجموعی تے ذمہ دارانہ ترقی غی خاطر تے اخلاقی اقدار نال۔ ونال سکھن گو درس دے۔

ITOO PLACEMENT

جموں کشمیر سرکار نے تعلیمی پے لیول 2 مانہ 7 ہزار روپیاں گا تعلیمی گریڈ پے غے تحت 786 اسٹینٹ پروفیسراں لائبریری تے فیزیکل ٹریننگ انسٹریکٹراں غی ترقی روزگار سکیم سی اے ایس غا ضمہ مانہ تعیناتیاں نانہ منظوری دے دتی ہے وزیر تعلیم سکینہ اتو نے اس بارے گل کرتا واں کہیو جے حالیہ براں غے دوران کی گئی تعیناتیاں غا سلسلہ مانہ یوہ ایک برو حکم نامو ہے۔ اُن غو کہنو تھو جے تعیناتیاں غا اس حکم نامہ سنگ اک دہائی تیں انتظار کر رہیا اہل امیدواراں گا مستقبل غو معاملو حل ہو گیو ہے اس موقع ور بولتا واں محترمہ اتو نے ویلے سر ترقیاں ، شفافیت تے اعلیٰ تعلیم نانہ ہور مضبوط بنان بارے سرکار غا وعدہ نانہ دہرایو۔

AMARNATH YATRA

سالانہ امرناتھ یاترہ غو سلسلو جاری ہے تے یاترہ شروع ہون غے 12 ویں روز توڑی 3 لکھ یاتری امرناتھ گفہ غا درشن کر چُکا ہیں۔ اسے دوران یاتریاں غو پندرھوں قافلو بھگوتی نگر یاتری نواس جموں تیں اج سویرے روانہ ہوو۔ اس قافلہ مانہ 5 ہزار 2 سو اک یاتری شامل این عہدیداراں نے جانکاری دیتا واں دسیو ہے جے ان یاتریاں وچوں 1 ہزار 7 سو 45 یاتری بال ٹال جدکہ 3 ہزار 4 سو 56 یاتری پہلگام غے رستے گفہ غو سفر کریں گا۔ یاتریاں گا اس قافلہ مانہ 3 ہزار 9 سو 70 مرد، 1 ہزار 1 سو 24 خواتین، 5 بچہ، 92 سادھو، 9 سادھویں، تے ایک خواجہ سرا یاتری شامل ہیں۔ اس قافلہ مانہ 1 سو 91 گڈیں شامل این۔

LEATHER CONSIGNMENT UK

بھارت تے برطانیہ بشکار جامع اقتصادی تے تجارتی معاہدہ نانہ عملا جان غا سلسلہ مانہ کل وجے پور تیں چمڑھ غی مصنوعات ور مبنی اک کھیپ نانہ چنڈی دس غے روانہ کیو گیو اس کھیپ نانہ ڈی جی ایف ٹی ، آر اے جموں وویک کمار سبھروال نے چنڈی دس غے روانہ کیو۔ اس موقع ور میڈیا غا نمائنداں سنگ گل کرتا واں جناب سبھروال نے اس معاہدہ سنگ بھارتی برآمد کاراں تے خاص کر جموں خطہ سنگ منسلک برآمد کاراں نانہ ملن آلا نمایاں موقعان ور لوہ پائی، اُنہاں نے دسیو جے بھارت برطانیہ سی ای ٹی اے معاہدہ غے تحت برطانیہ نانہ برآمد کی جان آلیں چمڑھ پارچہ باقی زراعت دواسازی تے ایم ایس ایم سی غی مصنوعات ور ہن محصول ادا کرن غی لوڑ نی وے غی۔ اُن غو کہنو تھو جے اس نال برطانیہ مانہ بھارتی مصنوعات ہور مقابلاتی ہوسکیں غی۔

JAMMU STATION PLATFORMS

شمالی ریلوے نے جموں توی ریلوے سٹیشن غا نواں تعمیر کیا گیا پلیٹ فارم نمبر 6 تے 7 نانہ وقف کیا جان غے نال نال پلیٹ فارم نمبر 4 تے 5 نانہ وی بحال کرتا واں قابل کار بنان گو اعلان کیو ہے۔ اس غے نال ہی جموں توی ریلوے سٹیشن ور ہن 7 پلیٹ فارم قابل کار ہو گیا ہیں تے اس نال مسافراں تے ریلوے ٹریفک گا انتظام غی صلاحیت مانہ باندو ہو گیو ہے۔ اس موقع ور ریلوے عہدیداراں غو کہنو تھو جے ان پلیٹ فارماں غا قابل کار ہو جان نال ریل گڈیاں غی آو جائی مانہ مزید سہولت ہو سکے غی نالے مسافراں گا انتظار گا وقت مانہ وی کمی آویگی تے زیادہ پیڑ پہاڑ تیں بچیو جاسکے گو مسافراں نانہ صلاح دتی گئی ہے جے وے ڈیجیٹل ڈسپلے بورڈ چیک کرلیں نالے پلیٹ فارم کراس کرن غی خاطر پیدل پُلاں غو استعمال کریں۔

WEATHER

محکمہ موسمیات نے آئندہ کل توڑی جموں کشمیر مانہ گرم موسم تے مربوط رہن غی پیشن گوئی کی ہے۔ محکمہ غے مطابق 18 تیں 20 جولائی غے بشکار مرکزی زیر انتظام علاقہ غا کئی مقامات ور گرج چمک غے نال تازہ بارش غو سلسلو جاری ہوسکے۔ خاص کر چناب وادی تے پیر پنجال علاقہ مانہ عوام نانہ مشورو دتو گیو ہے کہ وہ موسم تیں متعلق جاری ہدایات ور عمل کریں ، خاص طور ور شدید بارش تے گرج چمک غے دوران احتیاط برتیں۔

ANNOUNCEMENT

آکاشوانی جموں غی طرفوں بکھ بکھ زُمران واسطے درخواست طلب کی گئی ہیں۔ آکاشوانی جموں غا علاقائی خبراں غا شعبہ غی طرفوں پہاڑی زبان واسطے عارضی نیوز ریڈر کم مترجم (این آر ٹی) تے اسٹینو پینل غی تشکیل واسطے اہل امیدواراں تیں درخواست طلب کی گئی ہیں۔ درخواست گزاراں غو جموں کشمیر غو باشندو ہونو ضروری ہے تے اُن غی عمر 21 تیں 50 بہراں غے درمیان ہونی لوڑے۔

این آر ٹی واسطے اُمیدوار غو کسی تسلیم شدہ یونیورسٹی تیں گریجویٹ ہونو، پہاڑی زبان ور پکڑ مضبوط رکھنوتے نشریات واسطے عمدہ آواز غو ہونو لازمی ہے۔ جد کہ اسٹینو واسطے اُمیدوار غو کسی تسلیم شدہ تعلیمی بورڈ تیں بارہویں جماعت پاس ہونو، پہاڑی زبان ور مہارت رکھنو اور کمپیوٹر ور پہاڑی زبان مانہ 25 تیں 40 الفاظ فی منٹ غی ٹائپنگ رفتار ہونو لازمی ہے۔

خواہشمند اُمیدوار اپنی درخواستاں غی ہارڈ کاپی تمام مطلوبہ دستاویزات نال ہیڈ آف نیوز، ریجنل نیوز یونٹ آکاشوانی پنج تیرتھی جموں پُن کوڈ 180001 میں بزات خُدا اتار 19 جولائی 2026 تک جمع کرا سکیں۔

درخواست غی فیس جنرل زمرہ غا اُمیدواراں واسطے 355 روپے جد کہ ایس سی، ایس ٹی تے او بی سی زمرہ غا اُمیدواراں واسطے 265 روپے مقرر کی گئی ہے، جس مانہ 18 فیصد جی ایس ٹی وی شامل ہے۔ فیس پرسار بھارتی، آل انڈیا ریڈیو جموں غابینک خاطہ نمبر 10582387126 جہیڑو ایس بی آئی ہری ما رکیٹ مانہ ہے اُس مانہ آن لائن جمع کرا سکیں، جس غو آئی ایف سی کوڈ

SBIN0000657

ہے۔ جس مانہ فیس آئیگی غی سلف پاه سکرین شاٹ غی کاپی درخواست سنگ لائو لا زمی ہے جس ورٹرانزکشن آئی ڈی غو لکھیو ہونو لازمی ہے۔ تفصیلی اشتہار تے درخواست فارم آکاشوانی غی ویب سائٹ

www.newsonair.gov.in

غا آسامیاں غا سیکشن مانہ دستیاب ہے مزید معلومات واسطے اُمیدوار ان نمبرات ور رابطو کر سکیں۔ نمبر اس طرح ہیں۔ 01912546658- پاه 9697177241۔
